

# Powšitkowne WOZJEWJENJA

njedźelu, 21. junija 2020

## Spominanje na biskopa Spülbecka

Na Božej mši tutu njedźelu, 21. junija, we 8.30 hodź. w Budyskej tachantskej cyrkwi chce-  
dža na biskopa Otta Spülbecka składnostnje jeho 50. posmjertnin spominać. Kemše změ-  
je biskop Heinrich Timmerevers. Prědować budže Budyski tachantski farar Wito Sćapan.  
Kemšam přizamknje so krótki nyšpor při rowje biskopa Spülbecka na Mikławšku. K biskopej  
Spülbeckej je přinošk na třećej stronje aktualneho wudaća Katolskeho Posoła wozjewjeny.

## Serbske kemše w Drježdžanach

Drježdžanscy Serbja su na maćernorěčnu Božu mšu njedźelu, 28. junija, w 16 hodź.  
do cyrkwe swjateho Antonija w Drježdžanach-Löbtauwje, Bünauska hasa 10, přeproše-  
ni. Kemše změje farar Gabriš Nawka. Zetkanje w tamnišej wosadnicy zakonskich posta-  
jenjow koronoweje pandemije dla njebudže.

## Dźělowe městno pola Katolskeho Posoła

Towarstwo Cyrila a Metoda z.t. pyta wot 1. decembra wosobu, kotraž by redakciski team  
zesylniła. Dotalna sobudźelaćerka poda so kónc nowembra na wuměnk. Wuměnjenu při-  
stajenja su nimo wuznaća k wěrje a wučbje romsko-katolskeje cyrkwe wotzamknjene  
powołanske wukubłanje, jara dobre znajomosće serbskeje rěče, stawiznow a kultury,  
po móžnosći znajomosće rěče, stawiznow a kultury druhich słowjanskich krajow, znajo-  
mosće na polu žurnalizma, sadžby (Adobe InDesign), we wobdźělanju wobrazow (Ado-  
be Photoshop) kaž tež zakładne znajomosće na polu katolskeje nabožiny respektiwnje  
zwólniwość, sej to w krótkim času přiswojić. Wukonjeć maja so tohorunja z pomocu  
komputerowych programow zarjadniske nadawki. Mzda płáči so po tarifowym zrěčenju  
za zjawnostnu službu (TVöD). Zajimcy měli so hač do wutory, 30. junija, pola Towarstwa  
Cyrila a Metoda z.t., Póstowe naměsto 2, 02625 Budyšin, abo na mailowu adresu  
TCM@Posol.de pisomnje wo městno požadać. Tam zhonja nadrobnosće.

## Putnikowanje z biskopom do Kevelaera

Pod hesłom „Sym tam, hdžež sy ty!“ přeprošuje Drježdžansko-Mišnjanske biskopstwo  
zajimowanych wěriwych na putnikowanje do Münsterskeho biskopstwa. Duchowny  
nawod změje wottam pochadźacy biskop Heinrich Timmerevers. Cil busoweje jězby wot  
štwórtka hač do njedzele, 27. do 30. awgusta, je marijanske putniske městno Kevelaer.  
Planowany je tohorunja wopyt biskopskeho města Münstera. W tutej diecezy je biskop  
Timmerevers 15 lět jako swjećacy biskop skutkował. Zajimcy njech přizjewja so pola  
ATeams-Reiseservice w Budyšinje na Seminarskej 2, telefonowe čisło (0 35 91) 53 18 53  
abo z mailku pod bautzen@ateams.de. Tež dalše nadrobnosće tam zhonja.

## Tachantska pokładownja zaso wotewrjena

Wopyt Budyskeje tachantskeje pokładownje je zaso móžny. Hladajo na postajenja koronowe-  
je pandemije pak je ličba runočasnje w rumnosćach přitomnych wosobow na pjeć wobmje-  
zowana. Wuwzaće tworja swójby z wjace hač tři dźěćimi. Wodženja tuchwilu móžne njejsu,  
nošenje škita nosa a erta so doporuča. Pokładownja je wot póndzele do pjatka wot 10 do  
12 hodź. a wot 13 do 16 hodź. kaž tež přenju sobotu měsaca wot 10 do 15 hodź. wotewrjena.